



Broj: 06-09-1-3766-1/2022
Sarajevo, 24.11.2022. godine

SVIM TUŽILAŠTVIMA U BOSNI I HERCEGOVINI N/r glavnih tužilaca

PREDMET: Dostavljanje statističkih podataka o radu tužilaštva za 2022. godinu i ocjenjivanje rezultata rada nosilaca pravosudnih funkcija u tužilaštvima za 2022. godinu, *traži se*

Poštovani,

Visoko sudsko i tužilačko vijeće Bosne i Hercegovine (u daljem tekstu: VSTV BiH) ovim poziva glavne tužioce da dostave podatke o radu tužilaštava za 2022. godinu i provedu postupak ocjenjivanja rezultata rada nosilaca pravosudnih funkcija u tužilaštvima za 2022. godinu.

Napominjemo, VSTV BiH će za potrebe izrade odgovarajućih dijelova Godišnjeg izvještaja VSTV BiH za 2022. godinu, iz Sistema za automatsko upravljanje predmetima u tužilaštvima (TCMS) preuzeti statističke podatke o radu tužilaštava za prethodnu godinu. Podaci će se preuzeti iz TCMS-a 17.01.2023. godine nakon završetka radnog dana.

I. Dostavljanje statističkih podataka i izvještaja o radu tužilaštava za 2022. godinu

Tabele za obračun pojedinačnih i kolektivnih radnih rezultata u tužilaštvu dostupne su na Internet adresi: <https://vstv.pravosudje.ba/vstvfo/B/141/article/106391>

Potrebno je da tužilaštva predmetne tabele preuzmu, popune i dostave VSTV-u BiH najkasnije do **01.02.2023. godine** isključivo elektronskim putem na e-mail adresu: vstvstatistika@pravosudje.ba.

Za tačnost i blagovremenost podataka u TCMS-u i dostavljenih podataka u tabelama za obračun radnih rezultata u tužilaštvu odgovorni su glavni tužioci.

Podsjećamo da su tužilaštva dužna pripremiti izvještaj o radu tužilaštva za 2022. godinu u skladu sa **Smjernicama VSTV BiH** za izradu godišnjeg izvještaja o radu tužilaštava koje se mogu preuzeti na navedenoj Internet adresi. Tužilaštva su dužna dostaviti ovaj izvještaj VSTV-u BiH na slijedeće e-mail adrese: vstvstatistika@pravosudje.ba i vstvprojekatzatuzilastva@pravosudje.ba, u rokovima kako slijedi: Tužilaštvo BiH, Tužilaštvo Brčko Distrikta Bosne i Hercegovine i kantonalna i okružna tužilaštva dostavljaju izvještaj VSTV BiH najkasnije do 15.02.2023. godine, odnosno Federalno tužilaštvo Federacije Bosne i Hercegovine i Republičko javno tužilaštvo Republike Srpske najkasnije do 28.02.2023. godine.

Napominjemo, na navedenoj Internet adresi postavljene su i Smjernice za objavljivanje tužilačkih i sudskih odluka na službenim web stranicama i Tabela za objavljivanje tužilačkih odluka koja će tužilaštva koristiti prilikom izvještavanja VSTV BiH o načinu komuniciranja sa javnošću, uključujući i informisanje o objavi odluka u 2022. godini. Popunjenu Tabelu za objavljivanje tužilačkih odluka tužilaštva će dostaviti do 01.02.2023. godine na e-mail adresu vstvstatistika@pravosudje.ba uz tabele za obračun pojedinačnih i kolektivnih radnih rezultata u tužilaštvima.

Dodatno, podsjećamo da je VSTV BiH na sjednici održanoj 05. i 06.09.2018. godine usvojio „**Obrazac nove evidencije za evidentiranje podataka o oduzimanju imovinske koristi**“, o čemu su informisana sva tužilaštva dopisom broj 06-43-4-2953-1/2018 od 14.09.2018. godine. Na sjednici VSTV BiH od 06. i 07.07.2022. godine, usvojen je zaključak kojim ostaje na snazi isti način prikupljanja podataka o predmetima u vezi sa oduzimanjem imovinske koristi i za 2022. godinu, kako bi se, radi vršenja kontrole kvaliteta podataka, moglo napraviti poređenje sa podacima evidentiranim u TCMS Modul za bilježenje podataka o oduzimanju protivpravno stečene imovinske koristi čija je primjena počela od 01.01.2020. godine.

S tim u vezi, potrebno je da tužilaštva unesu tražene podatke u Tabelu 3. - Evidencija za sva krivična djela u kojima je oduzeta imovinska korist u skladu sa Uputstvom za period 01.01. - 31.12.2022. godine, a koji su postavljeni na gore navedenoj Internet adresi. U slučaju da u izvještajnom periodu nije bilo predmeta za koje se dostavljaju traženi podaci potrebno je da tužilaštva o tome dostave informaciju na navedenu adresu elektronske pošte u ostavljenom roku. Popunjenu Tabelu 3. ili informaciju potrebno je dostaviti VSTV BiH najkasnije do 01.02.2022. godine.

Napominjemo da su sve tabele za izvještavanje usklađene sa odredbama Pravilnika o orijentacionim mjerilima za rad tužilaca u tužilaštvima u Bosni i Hercegovini („Službeni glasnik Bosne i Hercegovine“, broj 6/22), koji se primjenjuje od 01.01.2022. godine.

II. Ocjenjivanje rezultata rada nosilaca pravosudnih funkcija u tužilaštvima za 2022. godinu

Kriteriji za ocjenjivanje rada nosilaca pravosudnih funkcija u tužilaštvima u BiH i obrasci za ocjenu rada nosilaca pravosudnih funkcija u tužilaštvima za 2022. godinu dostupni su na Internet adresi: <https://vstv.pravosudje.ba/vstvfo/B/141/article/106391>

VSTV BiH je na sjednici održanoj 09.11.2022. godine usvojio **Uputstvo za primjenu Kriterija za ocjenjivanje rada glavnog tužioca Tužilaštva Bosne i Hercegovine, Federalnog tužilaštva Federacije Bosne i Hercegovine, Republičkog javnog tužilaštva Republike Srpske i Tužilaštva Brčko Distrikta Bosne i Hercegovine, Kriterija za ocjenjivanje rada glavnih tužilaca, zamjenika glavnih tužilaca, šefova odjela/odsjeka u tužilaštvima u Bosni i Hercegovini i Kriterija za ocjenjivanje rada tužilaca u Bosni i Hercegovini (u daljem tekstu: Uputstvo)** broj 06-02-3-3660-1/2022, a koje je dostavljeno svim tužilaštvima putem elektronske pošte dana 21.11.2022. godine i dostupno je na gore navedenoj Internet adresi. Uputstvo je usvojeno kako bi se osiguralo da ocjenjivači na jedinstven način i pravilno primjene kriterije za ocjenjivanje u svim tužilaštvima u Bosni i Hercegovini.

Nadalje, ukazuje se na odredbu člana 3. Uputstva kojom je razrađena obaveza ocjenjivača da provede adekvatnu analizu rada i potpuno dokumentuje na odgovarajućim obrascima relevantne informacije i pokazatelje na osnovu kojih je izvršena dodjela bodova ocjenjivanom nosiocu pravosudne funkcije po pojedinim elementima ocjene rada. U tom pogledu, istom odredbom Uputstva predviđen je način na koji će Stalna komisija za efikasnost i kvalitet tužilaštava vršiti nadzor nad postupanjem ocjenjivača u provođenju postupka ocjenjivanja.

Napominjemo, potrebno je da ocjenjivač osigura da mu ocjenjivani nosilac pravosudne funkcije blagovremeno dostavi statističke podatke i analitičke informacije potrebne za provođenje ocjenjivanja rada glavnog tužioca, zamjenika glavnog tužioca i šefa odjela po elementu ocjene Organizacija i rukovođenje radom tužilaštva, odjela/odsjeka iz člana 30. stav (1) i člana 31. stav (1) Kriterija za ocjenjivanje rada glavnih tužilaca, zamjenika glavnih tužilaca i šefova odjela/odsjeka u tužilaštvima u BiH. Ocjenjivač će u Obrascu 1.2. i 1.3. (Obrazac za ocjenjivanje rada glavnog tužioca, zamjenika glavnog tužioca, šefa odjela) navesti koji izvori

informacija su korišteni prilikom ocjenjivanja rada glavnog tužioca, zamjenika glavnog tužioca, šefa odjela po navedenom elementu ocjenjivanja rada.

U vezi sa primjenom Uputstva posebno skrećemo pažnju na slijedeće:

1. Kolektivna orijentacijska norma tužilaštva (član 5. Uputstva)

Članom 5. Uputstva je predviđen izuzetak na način da se rezultati pojedinih nosilaca pravosudnih funkcija ne uzimaju u obzir kod obračuna kolektivne orijentacijske norme tužilaštva. U vezi s tim potrebno je obratiti pažnju na napomenu sadržanu u Tabeli o ostvarenoj orijentacijskoj normi koja se odnosi na način unosa podataka o ostvarenoj orijentacionoj normi za svakog nosioca pravosudne funkcije u tužilaštvu.

2. Odnos prema radu – realizacija plana rješavanja predmeta (član 7. Uputstva)

Procenat realizacije Akcionog plana za rad na predmetima ratnih zločina obračunava se u skladu sa članom 7. Uputstva¹.

3. Odnos prema radu – parametar b) člana 22. Kriterija (član 8. Uputstva)

Ukazujemo da je članom 8. Uputstva propisana obaveza ocjenjivača da u Obrascu broj 5. (Ažurnost i efikasnost rada tužilaca iz člana 22. stav (1) tačka b) Kriterija za ocjenjivanje rada tužilaca u BiH) i Obrascu broj 6. (Ažurnost i efikasnost rada glavnih tužilaca zamjenika glavnih tužitelja i šefova odjela/odsjeka u tužilaštvima u BiH) navede izvore informacija korištene pri analizi rada ocjenjivanog nosioca pravosudne funkcije, odnosno donošenja odluke o dodjeli bodova kao i detaljno obrazloži razloge dodjele određenog broja bodova po ovom elementu ocjene rada.

4. Element ocjene Posebni slučajevi ocjenjivanja (član 9. Uputstva)

Naglašavamo da je članom 9. Uputstva propisana obaveza ocjenjivača da u Obrascu broj 9., (Posebni slučajevi ocjenjivanja iz člana 23. stav (1) Kriterija za ocjenjivanje rada tužilaca u BiH) i Obrascu broj 9.1. (Posebni slučajevi ocjenjivanja iz 32. stav (1) Kriterija za ocjenjivanje rada glavnih tužilaca, zamjenika glavnih tužilaca i šefova odjela/odsjeka u tužilaštvima u BiH) navede činjenice i obrazloži okolnosti zbog kojih smatra da je u radu ocjenjivanog nosioca pravosudne funkcije, odnosno tužilaštva postignuta posebno izražena ažurnost i efikasnost u periodu ocjenjivanja.

5. Organizacija i rukovođenje radom tužilaštva/odjela (član 10. Uputstva)

Ukazujemo da je članom 10. Uputstva propisana obaveza ocjenjivača da u Obrascu broj 7. (Organizacija i rukovođenje radom tužilaštva iz člana 30. stav (1) parametar Kriterija za ocjenjivanje glavnih tužilaca, zamjenika glavnih tužilaca i šefova odjela/odsjeka u tužilaštvima u BiH) i Obrascu broj 8. (Organizacija i rukovođenje radom odjela u tužilaštvu iz člana 31. stav (1) Kriterija za ocjenjivanje glavnih tužilaca, zamjenika glavnih tužilaca i šefova odjela/odsjeka u tužilaštvima u BiH) navede izvore informacija korištene pri analizi rada ocjenjivanog nosioca pravosudne funkcije, odnosno donošenja odluke o dodjeli bodova kao i detaljno obrazloži razloge dodjele određenog broja bodova po ovom elementu ocjene rada.

Također se ukazuje na odredbe člana 10. stav (8), (9) i (10) Uputstva koje su usklađene sa zakonskim i podzakonskim okvirima u pogledu računanja rokova za postupanje po pritužbama po tužilačkim odlukama.

¹ Pored navedene odredbe Uputstva potrebno je ostvariti uvid u dopis VSTV BiH broj 06-09-1-2219-1/2022 od 20.06.2022. godine.

6. Ocjenjivanje šefova odsjeka (član 11. Uputstva)

Odredbama Pravilnika o orijentacionim mjerilima za rad tužilaca u tužilaštvima u Bosni i Hercegovini („Službeni glasnik Bosne i Hercegovine“, broj 6/22), koji se primjenjuje od 01.01.2022. godine, nisu propisana posebna orijentaciona mjerila za praćenje i mjerenje rada i radnih rezultata „šefa odsjeka“. S tim u vezi za ocjenjivanje ostvarenih radni rezultati šefova odsjeka će se primijeniti Kriteriji za ocjenjivanje rada tužilaca u BiH, te se neće ocjenjivati za ostvarene kolektivne radne rezultate odsjeka predviđene i Kriterijima za ocjenjivanje rada glavnih tužilaca, zamjenika glavnih tužilaca i šefova odjela/odsjeka u tužilaštvima u BiH.

7. Mjere za unapređenje rada (član 12. Uputstva)

Također napominjemo da je ocjenjivač dužan za nosioca pravosudne funkcije koji je ocijenjen ocjenom rada „nezadovoljavajuće obavlja funkciju“ ili „zadovoljavajuće obavlja funkciju“ popuniti Obrazac broj 4., i Obrazac broj 4a (Izveštaj ocjenjivača VSTV BiH) u skladu sa članom 12. Uputstva.

8. Rok za provođenje postupka ocjenjivanja i postupanje tužilaštava u bazi VSTV BiH

U skladu sa članom 4. stav (1) Pravilnika o postupku ocjenjivanja rada glavnih tužilaca, zamjenika glavnih tužilaca, šefova odjela/odsjeka i tužilaca (broj 06-02-3-3489/2016 od 14.12.2016. godine i broj 06-09-1-3283/2018 od 23.10.2018. godine), postupak ocjenjivanja rada potrebno je završiti i ocjene i unijeti obrasce za ocjenjivanje rada u bazu podataka VSTV-a BiH najkasnije **do 01.03.2023. godine**. Stalna komisija nadležna za nadzor nad ocjenjivanjem rada nosilaca pravosudnih funkcija u tužilaštvima (Stalna komisija za efikasnost i kvalitet tužilaštava), shodno članu 4. stav (5) Pravilnika je dužna izvijestiti VSTV BiH o ocjenjivačima koji propuste da blagovremeno provedu postupak ocjenjivanja.

Smatraće se da je ocjenjivanje rada okončano nakon što glavni tužilac o tome dostavi obavještenje na e-mail adresu vstvpravosudnauprava@pravosudje.ba. Ovo obavještenje će se bez odlaganja dostaviti VSTV-u BiH na Obrascu broj 3. koji je uvršten u materijale za ocjenjivanje rada na gore navedenoj Internet adresi. Posebno skrećemo pažnju na odredbu člana 13. Uputstva kojom je predviđeno da se obrasci iz člana 8. stav (2), člana 10. stav (2) i člana 12. Uputstva unose u bazu podataka VSTV BiH uz obrazac za ocjenjivanje rada nosilaca pravosudnih funkcija, shodno Uputstvu za popunjavanje elektronskog obrasca u bazi podataka VSTV-a BiH i unos skeniranih obrazaca za ocjenjivanje rada glavnih tužilaca, zamjenika glavnih tužilaca, šefova odjela i tužilaca u bazu podataka VSTV-a BiH.

U cilju efikasnog provođenja postupka izvještavanja o radu tužilaštva i ocjenjivanja rezultata rada nosilaca pravosudnih funkcija u tužilaštvu, **neophodno je da se blagovremeno upoznaju sa svim materijalima koji će se koristiti u ovom postupku:** glavni tužilac, nosioci pravosudne funkcije u tužilaštvu, sekretar tužilaštva i drugi zaposlenici u odjeljenju tužilačke uprave, šef pisarnice i odgovorni zaposlenici u pisarnici tužilaštva i IKT službenici tužilaštva. Od izuzetne je važnosti da se osigura da IKT službenici u tužilaštvima postupaju u skladu sa Uputstvom za popunjavanje elektronskog obrasca u bazi podataka VSTV-a BiH i unos skeniranih obrazaca za ocjenjivanje rada tužilaca u bazu podataka VSTV-a BiH.

Eventualna pitanja u vezi materijala za postupak izvještavanja o radu tužilaštva i ocjenjivanja rezultata rada nosilaca pravosudnih funkcija u tužilaštvu možete dostaviti putem e-mail adrese vstvpravosudnauprava@pravosudje.ba najkasnije do 26.12.2022. godine.

Za sve dodatne informacije u vezi sa pripremanjem traženih statističkih podataka za 2022. godinu i provođenjem postupka ocjenjivanja rezultata rada nosilaca pravosudnih funkcija

molimo Vas da kontaktirate Odjel za pravosudnu analitiku i izvještavanje putem naprijed navedene e-mail adrese.

S poštovanjem,



Dostaviti:

- Naslovu;
- Sekretarima tužilaštava,
- Šefovima pisarnica,
- IKT službenicima u tužilaštvima,
- Projektu Jačanje tužilačkih kapaciteta u krivično-pravnom sistemu,
- Odjelu za IKT Sekretarijata VSTV BiH,
- Odjelu za imenovanje i napredovanje Sekretarijata VSTV BiH.

